

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(VI)11

**SOALAN BERTULIS OLEH AHLI KAWASAN KEBUN BUNGA
YB. ONG KHAN LEE**

11. Apakah sasaran dan rancangan Kerajaan Negeri dalam pembasmian miskin tegar demi mencapai kemiskinan sifar dalam tempoh masa 5 tahun ini?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

11. Kerajaan Negeri sentiasa komited dalam hal-hal kebajikan rakyat khususnya pada golongan miskin tegar. Ini dapat dibuktikan dengan pelaksanaan program-program kebajikan dalam membasmi miskin tegar. Antara sasaran dan rancangan Kerajaan Negeri demi mencapai miskin sifar dalam tempoh masa lima (5) tahun adalah seperti berikut:-

(a) Program Agenda Ekonomi Saksama

Kerajaan Negeri telah mencapai sasaran sebagai negeri pertama yang bebas daripada miskin tegar sejak tahun 2009 melalui pelancaran Program Pembasmian Kemiskinan Tegar yang dikenali sebagai Program Agenda Ekonomi Saksama (AES) yang memberikan bantuan kewangan bulanan secara *top-up* kepada individu/keluarga yang mempunyai pendapatan per kapita RM220.00.

Bagi memperkasakan program AES ini, mulai tahun 2016, Kerajaan Negeri telah melaksanakan bantuan kebajikan ini secara bersyarat di mana tujuan utama adalah untuk memantau keberkesanan bantuan yang diberikan dan mengubah corak tingkah laku keluarga miskin. Antara syarat-syaratnya ialah setiap warga emas dalam keluarga miskin yang menerima bantuan perlu melakukan pemeriksaan kesihatan, bayi perlu disuntik vaksin dan memastikan anak-anak bersekolah. Syarat ini diperkenalkan untuk memastikan golongan ini mementingkan kesihatan dan pendidikan anak-anak supaya tidak mewarisi kemiskinan dari setiap generasi.

Melalui Mesyuarat Jawatankuasa Pembasmian Kemiskinan, anak-anak golongan miskin ini yang mempunyai Sijil Peperiksaan Malaysia (SPM) dan kurang berkemampuan dan tidak mampu membiayai pengajian ke peringkat lebih tinggi akan disyorkan untuk menyertai program *Vocational Skills Employment Programme* (VSEP) iaitu sebuah program yang menawarkan kursus-kursus kemahiran untuk belajar sambil bekerja dalam bidang yang diminati. Dalam program VSEP, pelajar diberi biasiswa dan juga elaun latihan vokasional.

Selain itu, Kerajaan Negeri juga bekerjasama dengan agensi-agensi kerajaan yang lain seperti Jabatan Tenaga Kerja yang berperanan untuk membantu mencari pekerjaan yang sesuai kepada orang miskin berdasarkan kelayakan pendidikan yang diperolehi.

Kerajaan Negeri akan memohon Kerajaan Persekutuan untuk mengkaji semula paras garis kemiskinan (PGK) dan perkapita semasa yang dilihat agak kurang relevan berbanding peningkatan kos sara hidup pada ketika ini. Kerajaan Negeri bercadang untuk menaikkan PGK daripada RM930.00 kepada RM1,500.00 perkapita RM220.00 kepada RM400.00 selaras dengan kesan kenaikan kos sara hidup dan peluang pekerjaan yang semakin rendah.

Semua usaha yang telah dilakukan ini diharapkan dapat memberikan motivasi, peluang dan ruang kepada golongan miskin untuk mendapatkan peluang pekerjaan, bantuan kewangan bulanan supaya dapat meningkatkan pendapatan keluarga mereka

seterusnya keluar dari paras kemiskinan serta mampu berdikari pad masa hadapan.

(b) Program i-Sejahtera

Kerajaan Negeri akan meneruskan Program i-Sejahtera bagi menghargai dan mengenang jasa bakti rakyat yang merangkumi warga emas, orang kurang upaya (oku), ibu tunggal, suri rumah, pelajar, dan bayi yang merangkumi program berikut:-

- (i) Program Penghargaan Warga Emas, Program Bantuan OKU, Program Bantuan Ibu Tunggal, Program Ibu Emas dan Program Skim Pelajar Emas yang dilaksanakan setiap tahun dengan sumbangan sebanyak RM100.00 seorang;
- (ii) Skim Pelajar Emas di mana bayaran RM100.00 secara one-off diberikan kepada pelajar tahun 1 dan 4, tingkatan 1 dan 4 bagi meringankan beban ibu bapa;
- (iii) Program Anak Emas yang merupakan program penghargaan kepada setiap kelahiran rakyat Negeri Pulau Pinang akan diberi RM200.00 secara *one-off* dan
- (iv) Bantuan *one-off* sebanyak RM1,000.00 kepada waris warga emas, ibu tunggal dan OKU bagi pengurusan jenazah.

Setakat ini, Program i-Sejahtera telah memberi manfaat kepada pelbagai lapisan masyarakat melibatkan sebanyak RM249,454,140.00.

(c) Program Ekonomi Khas

Kerajaan Negeri akan meneruskan Program Peningkatan dan Pemulihan Ekonomi (Bantuan Peralatan) di bawah Projek Khas Ekonomi. Program ini memfokuskan kepada peniaga kecil sepenuh masa termasuk golongan miskin yang telah menjalankan perniagaan sekurang-kurangnya 1 tahun dan berpendapatan perniagaan kurang dari RM3,000.00 sebulan. Bantuan peralatan bertujuan bagi membantu peniaga mengembangkan perniagaan sedia ada untuk output yang lebih besar. Sehingga kini, Kerajaan Negeri telah membelanjakan sebanyak RM1,419,848.12 kepada 640 orang penerima di semua daerah.

(d) Skim Pinjaman Harapan (SPH) Negeri Pulau Pinang

Skim Pinjaman Harapan (SPH) Negeri Pulau Pinang yang dahulunya dikenali sebagai Projek Titian Saksama Rakyat (PTSR) Negeri Pulau Pinang akan diteruskan bagi mengurangkan kemiskinan melalui program mikrokredit yang memberikan pinjaman tanpa sebarang cagaran dan penjamin kepada peniaga-peniaga kecil untuk membantu usahawan tempatan, penganggur dan golongan miskin untuk menceburi bidang perniagaan. Peruntukan dana sebanyak RM11 juta telah disediakan bagi tujuan ini. Jumlah pinjaman adalah di antara RM2,000.00 hingga maksima RM25,000.00 dan tempoh bayaran balik adalah di antara 2 hingga 3 tahun. Sehingga bulan Jun 2018, sebanyak RM14.77 juta telah diagihkan kepada seramai 2,974 orang usahawan.

(e) Tabung Usahawan Tani (TUT)

Kerajaan Negeri telah memperkenalkan Tabung Usahawan Tani (TUT) Negeri Pulau Pinang yang sebelum ini dikenali sebagai Tabung Usahawan Tani Muda (TUTM) yang memberi dorongan kepada golongan belia termasuk golongan miskin untuk menjadikan sektor industri asas tani sebagai kerjaya dan berpotensi sebagai punca pendapatan yang lumayan. Peruntukan

sebanyak RM750,000.00 telah disediakan di mana sehingga Jun 2018, sebanyak RM582,000.00 telah diagihkan kepada 108 orang belia termasuk golongan miskin untuk menikmati kemudahan kredit ini.

(f) *Penang Career Assistance and Talent Centre*

Kerajaan Negeri melalui Pusat CAT (*Penang Career Assistance and Talent Centre*) menjalankan pepadanan jawatan kepada semua golongan pencari kerja termasuk rakyat miskin berdasarkan penawaran oleh industri. Sejak penubuhan Pusat CAT pada Mac 2009 sehingga Jun 2018, seramai 10,205 orang termasuk rakyat miskin telah berdaftar sebagai pemohon pekerjaan di mana sebanyak 6,430 pepadanan jawatan telah dijalankan iaitu sebanyak 63%.

(g) *Program Meister Malaysia*

Dalam membantu rakyat miskin mendapat peluang pekerjaan, Kerajaan Negeri melalui Penang Skills Development Centre (PSDC) telah memperkenalkan Program Meister Malaysia bagi meningkatkan bakat dalam bidang teknikal dan vokasional selari dengan perkembangan Industri 4.0. Kerajaan Negeri telah memperuntukkan RM6 juta untuk Program Meister Malaysia. Peserta yang terpilih akan menjalani latihan peningkatan kemahiran dan pada masa yang sama bekerja di kilang untuk memperoleh kemahiran pekerjaan yang sebenar. Para peserta program ini tidak perlu membayar yuran pengajian kerana telah dibiayai Kerajaan Negeri dan pada masa yang sama menerima gaji daripada syarikat tersebut.

(h) Program Penang Sihat

Kerajaan Negeri telah memperkenalkan Program Penang Sihat di mana isi rumah berpendapatan RM5,000.00 ke bawah akan menerima kredit RM300.00 setahun manakala individu yang tidak berkahwin dengan pendapatan kurang daripada RM2,500.00 sebulan akan mendapat kredit RM150.00 setahun dengan had RM50.00 setiap lawatan melalui Kad *I Love Penang*. Program ini bakal memanfaatkan 195,000 isi rumah termasuk golongan miskin dan dijangka akan menelan belanja sebanyak RM60 juta setahun.

Dalam tempoh lima tahun akan datang, Kerajaan Negeri mensasarkan dapat mengekalkan Pulau Pinang sebagai negeri miskin sifar tegar dan juga berharap penglibatan proaktif daripada pihak swasta dan NGO untuk bersama-sama Kerajaan Negeri dalam memastikan kebajikan rakyat Pulau Pinang terbela dan terjaga.